

14/07/2001

RM300j dana TUM diagih tempoh setahun

Badrila Jamlus

BANK Pertanian Malaysia Bhd (BPM), penyalur tunggal Tabung Untuk Makanan (TUM), dijangka mampu mengagihkan dana tambahan RM300 juta yang diperolehinya untuk tabung itu dalam tempoh setahun.

Pengerusi BPM, Datuk Sulaiman Daud, berkata tempoh itu adalah jauh lebih singkat berbanding setahun tujuh bulan yang diambilnya untuk mengagihkan peruntukan pertama TUM berjumlah RM300 juta pada 1999.

BPM yang akan mula menyalurkan dana itu pada 15 Julai ini, menjadi institusi tunggal melaksanakan TUM yang bertujuan merangsang pelaburan dalam sektor pertanian khususnya pengeluaran industri makanan.

Peruntukan tambahan itu adalah sebahagian daripada pengumuman Perdana Menteri, Datuk Seri Dr Mahathir Mohamad pada Mac lalu mengenai pakej pemulihan ekonomi berjumlah RM3 bilion.

Sulaiman berkata, pihaknya sedang mengadakan pameran bergerak ke seluruh negara bagi mempromosikan skim pembiayaan pertanian itu termasuk mengenal pasti petani atau penternak yang mempunyai berpotensi mengembangkan perniagaan.

"Kerajaan memutuskan semua peruntukan tambahan itu disalurkan menerusi BPM berikutan kejayaannya mengeluarkan hampir RM550 juta daripada peruntukan RM1 bilion yang dikeluarkan sejak 1993 hingga 1999," katanya di Kuala Lumpur, semalam.

Dana TUM berjumlah RM1 bilion yang disediakan kerajaan itu disalurkan melalui Bank Negara Malaysia kepada bank perdagangan dan institusi kewangan termasuk BPM.

"Ini adalah salah satu dari strategi kerajaan dan diharap dapat membantu negara dalam usaha mempercepatkan proses pemulihan ekonomi selain menambah sumber makanan dalam negeri.

"Usaha ini sekali gus dapat mengurangkan import makanan dan menstabilkan harga bahan makanan dalam negara," katanya.

Sulaiman berkata, TUM menawarkan satu kemudahan pembiayaan mudah dengan kadar faedah pinjaman yang diturunkan daripada empat peratus kepada 3.75 peratus setahun.

"Tumpuan tabung ini adalah kepada kegiatan pengeluaran makanan berasaskan sumber mentah tempatan serta dapat dihasilkan dengan cepat seperti penternakan ikan, haiwan, penanaman sayur-sayuran, buah-buahan, padi dan ubi," katanya.

Ditanya mengenai pengagihan dana daripada RM550 juta yang dikeluarkan sebelumnya, beliau berkata 51 peratus diagihkan untuk sektor penternakan yang membabitkan jumlah RM278 juta; sektor tanaman (26 peratus); perikanan (20 peratus) dan pemprosesan (23 peratus) manakala pengedaran serta bioteknologi (0.7 peratus).

Sulaiman berkata, BPM yang dilantik sebagai penyalur tunggal dana itu sejak 1999 lalu, menawarkan pinjaman minimum RM10,000 dan maksimum RM3 juta kepada peminjam yang layak.

(END)